

05/09/2003

Pantai peranginan jana pendapatan

PORT DICKSON: Sektor pelancongan, terutama kawasan pantai peranginan di sini, diiktiraf sebagai produk pelancongan yang menjana pendapatan besar kepada kerajaan negeri ini membabitkan beratus juta ringgit setahun.

Menteri Besar, Tan Sri Mohd Isa Abdul Samad, berkata kebanjiran pengunjung ke pantai Port Dickson membolehkan kerajaan negeri memperoleh RM14.1 juta, sepanjang enam bulan pertama tahun ini.

Pada tahun lalu, katanya, sebanyak RM292.5 juta diperoleh hasil kedatangan pengunjung ke pantai itu.

Sehubungan itu, katanya, kerajaan negeri dengan bantuan Kerajaan Pusat sentiasa berusaha mempertingkatkan kemudahan dan infrastruktur di daerah ini, selain memulihara dan memperindahkan kawasan pantai.

"Kawasan pantai dari Batu 3 (Kilometer 4.8) hingga Batu 8 (Km 12.8) sudah diluluskan Perdana Menteri, Datuk Seri Dr Mahathir Mohamad sebagai pantai rizab.

"Kerajaan Pusat juga sudah meluluskan projek menaik taraf Jalan Linggi-Pasir Panjang bernilai RM120 juta, manakala Jalan Pasir Panjang-Port Dickson dan Port Dickson-Lukut masih menunggu peruntukan," katanya.

Beliau berkata demikian ketika merasmikan Pesta Port Dickson (Pesta PD) 2003 di tapak pesta di sini.

Mohd Isa berharap penduduk setempat juga bekerjasama dengan kerajaan, terutama dalam menjaga tahap kebersihan kawasan pantai supaya tidak tercemar sekali gus menarik lebih ramai pengunjung.

"Kita dapati tahap kesedaran pemuliharaan kawasan pantai di kalangan masyarakat setempat masih belum mencapai tahap memuaskan. Jadi, kita harap mereka lebih sedar mengenai kepentingan menjaga keindahan dan kebersihan pantai," katanya.

Terdahulu, pelancaran Pesta Port Dickson 2003 berlangsung dalam majlis yang sederhana, sesuai dengan temanya, 'Sure Meriah'. Simbolik perasmian itu menyaksikan Mohd Isa melepaskan belon udara yang membawa bunting Pesta PD.

Pengunjung juga dihiburkan dengan nyanyian dan tarian tradisional, persembahan makyung dari Akademi Seni Kebangsaan (ASK) dan persembahan penyanyi popular, Ning Baizura.

Pesta itu yang bermula 29 Ogos lalu akan berakhir 14 September ini.